

Date – 14/10/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Nov ni 11-a Dampa bial bye election vote thlak turah nimin atang khan chuh tumte hming thehluh hun hawn tan a ni a, ni 21 thleng hun hawn a ni ang.
2. Ramchhunga sawrkar damdawi in tha bik tehnaah Primary Health Centre pahnih Sialsuk PHC leh Suangpuilawn PHC an tling thar leh.
3. External Affairs Minister Dr S Jaishankar chuan nizan khan New Delhi-ah Mongolia President Khurelsukh Ukhnaa a kawm.
4. India chuan Hamas ten Israel mi an hrente an chhuah vek chu lawmawm a tih thu a sawi.

<><><>

DAMPA BY ELECTION

Nov ni 11-a Dampa bial bye election vote thlak turah nimin atang khan chuh tumte hming thehluh hun hawn tan a ni a, ni 21 thleng hun hawn a ni ang.

Returning Officer Pu Malsawmzuala thuchhuah siamah chuan nimin tlai dar 3:00 thleng inthlanna chuh tum hming pe lut an awmlo ni.

Election Commission of India chuan Dampa bial by-election neih hun tur atan November ni 11 anih tur thu a sawi a, vote chhiar hun atan November ni 14 anih tur thu a sawi.

Dampa bialtu MLA Pu Lalrintluanga Sailo a thih avanga by-election neih turah hian sawrkar lai ZPM party chuan August ni 25 khan an party candidate atan Pu Vanlalsailova an lo puang tawh a, September ni 2 khan MNF Party chuan an party candidate atan Dr R. Lalthangliana an puang a, Congress Party chuan september ni 10 khan an party candidate atan Pu John Rotluangliana an puang a, BJP chuan september ni 19 khan an party candidate atan Pu Lalhmingthanga an ruat tih an sawi bawk a ni.

Dampa bialah hian Vote nei zawng zawng Mipa 10605 leh hmeichhia 10185 an vaiin 20790 an ni a, Draft Roll atanga vote nei punna ni 385 a ni.

Final Roll tlangzarh takah hian Polling Station 41 awmin, Polling Station Pakhat zelah Elector 507 awm ang an ni a. Voter tlemna ber hi Zopui Polling Station niin Voter 30 an awm a, Voter tamna ber hi Silsury -I Polling Station a ni a, Voter 1103 an awm a. Service Voter hi 115 a awm bawk a ni.

<><><>

TRAFFIC REPORT

Kumin January thla atanga September thla chhungin Mizoramah lirtheia chetsualna liantham vawi 81 a thleng a, mi 70 in nunna an chan tawh.

Traffic thuneitute hnen atanga Akashvani Aizawl thu dawn danin, lirtheia chetsualna an chhinchhiah vawi 81 zinga 62-ah te chuan thihna a thleng a, mi 70-in nunna chanin, midang 24 na takin an hliam a, mi 14 na vak lovin an hliam thung a. Kumin chhungin March thla kha lirtheia chetsualna thlen tam ber thla niin, vawi 16 a thleng a, June thla ah thleng tlem berin vawi 4 a thleng thung a ni.

Traffic hotute chuan Mizorama accident thleng tam zawk chu a khalhtu fimkhur loh vang a ni a, a khalhtu ruih vang leh lirthei khawl lam fel lo vang te chu zaa 10 vel ve ve a ni a ti a. Mizoram chu tlang ram a nih bakah kawng kawi tam tak a awm avangin mipuite chu fimkhur taka lirthei khalh turin an chah a, lirthei te tha taka enkawl thin tur leh vanduaina tawh palh pawha dan anga thiam an chan theihna turin lirthei document felfai taka enkawl turin an chah bawk a ni.

Traffic thuneitute chhinchhiah danin, Mizoram district hrang hrang zingah Aizawl district-ah lirtheia chetsualna leh thihna thleng tam berin, vawi 37 chetsualna thlengah mi 26 in nunna an chan a, Kolasib District-in dawtin, lirtheia chetsualna vawi 11 thlengah mi 8 an thi a, Lunglei District-ah vawi 6 thlengin mi 5 an thi a, Hnahthial district-ah vawi 5 thlengin mi 7 in nunna an chan a, Siaha District-ah vawi 4 thlengin mi 6 an thi a, Lawngtlai District-ah vawi 4 thlengin mi 5 an thi a, Saitual District-ah lirtheia chetsualna vawi 4 thlengah mi 4 an thi a, Champhai District-ah vawi 4 thlengin mi 3 an thi a, Serchhip district-ah vawi 3 thlengin mi 3 an thi a, Khawzawl district-ah vawi 2 thlengin mi 2 an thi a, Mamit District-ah lirtheia chetsualna liantham vawi 1 thlengin mi pakhatin nunna a chan a ni.

<><><>

PHC CERTIFICATION

Ramchhunga sawrkar damdawi in tha bik tehnaah Primary Health Centre pahnih Sialsuk PHC leh Suangpuilawn PHC an tling thar leh a, heti hian Mizoram chhunga HWC-PHC 57 target awm zinga 36-in National NQAS certificate an nei tawh a ni.

National Health Mission, Mission Director Dr. Lily Chhakchhuak chuan India rama sawrkar damdawi in tha bik tehna, National Quality Assurance Standards (NQAS)-a tling thar Sialsuk PHC leh Suangpuilawn PHC te hian a tehnaah zaa 90.06 leh zaa 93.14 te an hmu tih a sawi a. Heti hian Mizoram chhunga Sawrkar damdawi in 49 te chu NQAS national certificate nei tawh an ni a. Tunah hian sawrkar damdawi in 18 leh HWC Sub-Centre 21-in state level certificate nei mekin national certificate result nghak mek PHC 3 an awm bawk a ni.

National Quality Assurance Standards (NQAS) certified damdawi in te hi endikna chhawng thum paltlang an ni a, a tawp bera endikna an hmachhawn hi National External Assessment a ni a, state pawn atangin Assessor an lo kal thin a ni. Hetah hian zaa 7% an hmuh chuan certified an ni chauh thin. Heng certified tawh damdawi inah te hian natna darh thei ven kawngah te, thawktu zawng zawngte an hna bil an thiamna te, an level zelah enkawl na an pek that dan te, a thlawna enkawl na leh damdawi pek te, damdawi in faina leh dik taka damdawi in

bawllhlawh sawngbawl te, hawihawmna leh a chhehvel vawnfai kawngah te, environment vawn that kawngah te endik an ni.

Health Minister Pi Lalrinpuii chuan India rama Damdawiin tha tehna a tling thei tura thawktu Dr. C. Lalhmangaiha, MO, Sialsuk PHC leh Dr. Lalrinsangi, MO, Suangpuilawn PHC leh an thawhpuite thawhrimna chu fakawm a tiin lawmthu a sawi a ni.



SAIRANG REL

Sairang a rel a luh hnuah Mizoramah khualzin an pung nasa hle a, sum vei vak a pun phah ni a sawi a ni.

Nimin kha Sairanga rel a lo luh atanga thla 1-na chiaah a ni a, Akashvani Aizawl zawhna chhangin Hotel Jay Jay, Falkland Veng, Aizawl neitu Pu Jarvis Lalramnghaka Chhakchhuak chuan September ni 13-a Sairang rel a service tan atang khan an Hotel a mikhual thleng zat chu a letin an pung tih sawiin, an room neih zatah pawh an leng lo fo a ti a, state pawn atanga khualzinte chuan Mizote fel an tih thu leh Mizoram nuam an tih thu sawiin, rel rawn lut chu Hotel neitute chauh ni lovin mi tam takin an tangkaipui a ti a, Mizorama tlawh tur hmun hrang hrangah te tlawhtu an tam phah a, taxi leh lirthei hmanga eizawngten an tangkaipui a, khualzinten Mizo thil an ei chak avang leh Mizoram thil hawn an duh thin avangin thingpui dawr leh Bazar-a sumdawngte pawhin an hlawkpui hlea a rin thu sawiin, tunhmaa khawlaia sum vei vak tlem thin chu rel service hnuah a pung hluai nia a hriat thu a sawi a ni.

Zotlanga The Annexe Homestayneitu Nunui pawhin rel rawn luh hnuah mikhual an pung nasa a ti a, Assam leh West Bengal atangin an tam zual tih sawiin, Kerala leh state dang atang te pawhin tunhmaa thlawhna a rawn zin ngam lo, sum seng tam ngam lo leh zirlaite zingah rel rawn luh hnua rawn zin lut an tam a ti a, state dang mite zingah Shillong aiin Aizawl nuam ti zawk an tam tawh tih sawiin, kawngpui te siam tha in Mizoram thingtlang khua te chu tlawh tlaka siam a nih pheh chuan hmarchhak state zinga tlawh hlawn zual Sikkim leh Meghalaya te aiin Mizoram chu a nep bik lova a hriat thu a sawi a ni. Nunui chuan loneimi te pawhin lo nei chung pawhin room 2/1 awmna homestay te hawng se, hah taka kum khat chhunga lo neih atanga an sum lakluh thin chu hahdam takin thla khat chhung lekin an lakluh theih a rin thu a sawi a, khualzinte chuan Mizote chu khualzin lo chhawn leh puih kawngah fel an tih thin avangin Mizoram chuan khualzin hip kawngah theihna sang tak a nei nia a hriat thu a sawi bawk a ni.

Kum 11 chhung lirtheia khualzin phur kuala eizawng Pu Ramnuna chuan Sairanga rel a luh hnuah khualzin zaa 70 vela an pung nia a hriat thu a sawi a, khualzin phur kuala eizawng thin lirtheite chu an indaih lo hle a ti a, rel rawn luh hnuah Assam leh West Bengal atanga rawn zin an tam zual tih sawiin, Aizawl leh a chhehvela hmun tlawh tur awm: Reiek tlang, Lalsavunga Park, Solomona Temple, Aizawl Peak View Point leh Skywalk te bakah Mizoram leh Myanmar inrina Zokhawthar leh Mizo pipu sulhnu tamna, Vangchhia, Farkawn leh Dunglelangte chu khualzin te tlawh duh zual a ni a ti a, Champhaia hnahsin kut lo awm turah pawh tunhnai hian khualzin an kal tam hle niin a sawi a ni.

Sairang Rel Station ILP counter atanga Akashvani thu dawn danin, September ni 13 atanga vawiin October ni 13 thlengin Sairang rel stationah ILP 5154 pek chhuah a ni tawh a, Guwahati - Sairang Express a chuangte zingah ILP pekchhuah a tam ber a ni.

<><><>

SIAHA E SHRAM

Siahaa District Labour and Employment Office (DLEO) leh District Information and Public Relations Office tangkawpin DIPRO Conference Hall, Council Vaih-ah unorganised worker te tan e-SHRAM a inziakluhna runpui buatsaih a ni.

Nimin khan a Hawnna hun tawi hmannaah DLEO Dy Director Pu Reuben T Kompa chuan e-SHRAM a inziaklutte tana hamthatna hrang hrang tarlangin kalkhawmte chu an thenawmte leh chhungte, hna nget neilote hnenah e-SHRAM chungchang hrilhre theuh turin a chah nghal bawk.

e-SHRAM chu Ministry of Labour & Employment hmalakna niin Ram chhunga Sawrkar hna nget neilo, mahni kut ke a eizawn) te hamthatna tura buatsaih a ni. e-SHRAM portal a inziaklut thei chin chu unorganised worker, kum 16-59 inkar niin, hamthatna hrang hrang awmin Kum 60 an tlin huna thla tin cheng 3,000/- thlenga pension dawn theihna a nih bakah an mahni an boral palh pawha an nupui/ pasal ten pension an nei theihna a ni. Hei bakah e-shram hnuaia inziaklutte chu PMSBY hnuaiah thun fel nghal niin accident tawh palh thua insurance cheng nuai 2 thlenga lak theihna a ni bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

EAM

External Affairs Minister Dr S Jaishankar chuan nizan khan New Delhi-ah Mongolia President Khurelsukh Ukhnaa a kawm. President Ukhnaa hian nimin khan ni li cham turin India a lo thleng a. Airport-ah Union Minister of State for Civil Aviation Murlidar Mohol chuan a lo hmuak a ni.Dr.Jaishankar-a chuan Mongolia President chu ram pahnih thawhdunna ti hmasawn tura hma alaknaah lawmthu sawiin PM Modia nen an inkawmna chuan hmasawanna a thlen ngei a beisei thu a sawi.

<><><>

GAZA CEASEFIRE

India chuan Hamas ten Israel mi an hrente an chhuah vek chu lawmawm a tih thu a sawi. Prime Minister Narendra Modia chuan social media kaltlanga lawmthu sawiin US President Donald Trump-an remna siam tura a hmalakna leh Israel PM Benjamin Netanyahu-a thutlukna ropui tak vang a nih thu a sawi a. India chuan remna siam tura President Trum-a hmalakna chu a thlawp tlat thu a sawi.

Gaza indona titawp tura ruahmanna thawhkhawtnaah nimi khan Hamas te hian Israel mi an hren mi 20 te chu kum 2 hnuah an chhuah zalen a. Israel lamin Palestinian an hren mek mi 1900 an chhuah ve bawk a. Hamas in an mi hren an chhuahte hi Red Cross kuta dah niin an ni hian Israel kutah a hlan chhawng leh dawn a ni. Inkahhai inremna angin US sipai kaihhruaiin ram hrang hrang sipai 200 chuangin inkahhai puan hi an vil ang.

Israel leh Hamas indona ti tawp tur hian International Peace Summit Egypt ah neih a ni a. He hunah hian US President Donald Trump leh Egypt President Abdel Fattah el-Sisi te chuan inhmuhkhawm hi an kaihruai a. Ram 20 atangin hruiute an kalkhawm dawn a. Gaza indona titawp tura inremna an siam dawn a ni. Ram hruiute kal tur zingah hian UK Prime Minister Keri Starmer leh UN Secretary-General Antonio Guterres te pawh an tel a. Asia khawthlang lama remna leh muanna siam tur leh hun thar tha zawk din turin an inhmuhkhawm dawn a ni.

<><><>